

Pillaatissinneqarsimasut tigummigallagaasullu politiit isertitsiviiniittut, pineqaatissinneqarsimasunut inissiisarfinniittut aamma eqqarsartaatsimikkut nappaatillit napparsimmavinnut unitsinneqarsimasut mattussaasut illup iluani pujortarsinnaaneratt pillugu Namminersorlutik Oqartussat nalunaarutaat

Pujortarnermik inerteqquteqarneq pillugu Inatsisartut inatsisaanni nr. 15-imi, 26. maj 2010-meersumi § 9, imm. 3 naapertorlugu aalajangersarneqarput:

Pillaatissinneqarsimasut tigummigallagaasullu politiit isertitsiviiniittut

§ 1. Pillaatissinneqarsimasut tigummigallagaasullu, politiit isertitsiviiniittut, isertitsivimmi pujortarsinnaapput, tassunga ilanngullugu isertitsivimmi inimi ataatsimoortarfimmi, tamanna politiit isertitsiviiniittarneq pillugu malittarisassanut Politimesterimit aalajangersarneqarsimasunut qaqugukkulluunniit atuuttunut akerliunngippat.

Imm. 2. Pillaatissinneqarsimasut tigummigallagaasullu allat kiisalu sulisut eqqarsaatigalugit imm. 1 naapertorlugu pujortartarneq, piffissani pillaatissinneqarsimasut tigummigallagaasullu allat sulisulluunniit isertitsivimmi isersimanerini pisinnaassanngilaq.

Imm. 3. Politiiit pillaatissinneqarsimasunut tigummigallagaasunullu atugassamik illup iluani silamiluunniit pujortartarfiliorsinnaapput. Illup iluani pujortartarfiliortoqassappat, igalaalerneqassaaq imaluunniit silammut silaannarissarfilerneqassaaq, taamaalilluni ingerlaavartumik silaannarissaasoqarsinnaassalluni. Qulakkeerneqassaaq pillaatissinneqarsimasut tigummigallagaasullu allat kiisalu sulisut inimi pujortartarfeqarnerup kingunerisaanik pujoorfingineqannginnissaat. Inimi pujortartarfimmi pujortarneq matu matullugu pisassaaq.

Imm. 4. Isertitsivimmi imm. 1 aamma imm. 2 naapertorlugit imaluunniit inimi pujortartarfimmi pujortartoqassappat, politiit qulakkiissavaat isertitsivimmi inimilu pujortartarfimmi akuttunngitsumik silaannarissaasoqartarnissaa.

Pineqaatissinneqarsimasunut inissiisarfinniittut

§ 2. Pinerluuteqarsimasunik Nakkutilliisoqarfup inissiisarfini pineqaatissinneqarsimasut inissinneqarsimasut aalajangissavaat, namminneq iniminni pujortartoqarsinnaassanersoq. Nammineq inigisami pujortarneq matu matullugu pisassaaq.

Imm. 2. Imm. 1 naapertorlugu taamaallaat pujortartoqarsinnaavoq, tamanna ullormut aalajangersakkanut qaqugukkulluunniit atuuttunut inissiisarfiup pisortaanit aalajangersarneqarsimasunut akertiunngippat.

Imm. 3. Sulisut eqqarsaatigalugit inissiisarfiunniittunut nammineq inigisami pujortarneq piffissani sulisut isersimanerini akuerisaanngilaq.

Imm. 4. Pinerluuteqarsimasunik Nakkutilliisoqarfik pinerluuteqarsimasunut inissiisarfiunniittunut atugassamik illup iluani silamiluunniit pujortartarfiliorsinnaavoq. Illup iluani pujortartarfiliortoqassappat, igalaalerneqassaaq imaluunniit silammut silaannarissarfilerneqassaaq, taamaalilluni ingerlaavartumik silaannarissaasoqarsinnaassalluni. Qulakkeerneqassaaq pineqaatissinneqarsimasut allat kiisalu sulisut inimi pujortartarfeqarnerup kingunerisaanik pujoorfigineqannginnissaat. Inimi pujortartarfimmi pujortarneq matu matullugu pisassaaq.

Imm. 5. Nammineq inigisami imm. 1-3 naapertorlugit, inimiiluunniit pujortartarfiusumi, pujortartoqassappat, Pinerluuteqarsimasunik Nakkutilliisoqarfip qulakkiissavaa nammineq inigisami inimiiluunniit pujortartarfiusumi akuttunngitsumik silaannarissaasoqartarnissaa.

Eqqarsartaatsimikkut nappaatillit napparsimmavinni unitsinneqarsimasut mattussaasut

§ 3. Eqqarsartaatsimikkut nappaatillit napparsimmavinni unitsinneqarsimasut mattussaasut aneerasaartarfimmi igalaalersukkami pujortartarfissatut aaqqissuussaasumi pujortarsinnaapput, tamanna sulisut malittarisassaannut akertiunngippat. Aneerasaartarfimmi pujortarneq matu matullugu pisassaaq. Qulakkeerneqassaaq eqqarsartaatsimikkut nappaatillit allat mattussaasut kiisalu sulisut aneerasaartarfip pujortartarfiunerata kingunerisaanik pujoorfigineqannginnissaat.

Imm. 2. Pisuni immikkut illuinnartuni sulisut aalajangissavaat eqqarsartaatsimikkut nappaatillit mattussaasut namminneq inigisaminni pujortarsinnaanersut. Nammineq inigisami pujortarneq sapinngisaq naapertorlugu matu matullugu pisassaaq.

Imm. 3. Sulisut eqqarsaatigalugit eqqarsartaatsimikkut nappaatillit mattussaasut namminneq inigisaminni pujortarsinnaatitaanngillat piffissani sulisut isersimanerini. Eqqarsartaatsimikkut nappaatillit mattussaasut allat kiisalu sulisut eqqarsaatigalugit aneerasaartarfimmi pujortartoqassanngilaq, piffissani eqqarsartaatsimikkut nappaatillit mattussaasut allat imaluunniit sulisut aneerasaartarfimmiinneranni.

Imm. 4. Aneerasaartarfimmi imaluunniit nammineq inigisami imm. 1-3 naapertorlugit pujortartoqassappat, sulisut qulakkiissavaat aneerasaartarfimmi aamma nammineq inigisami akuttunngitsumik silaannarissaasoqartarnissaa.

Atuutilerfia

§ 4. Nalunaarut manna atuutilerpoq ulloq 1.oktober 2010.

Namminersorlutik Oqartussat, ulloq 29. september 2010

Agathe Fontain

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut